

Date – 02/10/2025

Time - 07:30 -07:40Hrs

AKASHVANI AIZAWL
REGIONAL NEWS BULLETIN

HEADLINES (MORNING)

- 1. Nimin khan Hnahthial DC Conference Hall-ah Faina Hapta-Swachhta Hi Seva 2025 kharna hun hman a ni.**
- 2. Mizoram Larsap General (Retd.) Vijay Kumar Singh chuan nimin khan Sairang Railway Station tlawhin a enfiah a, Railway hotute a kawm bawk.**
- 3. Lungsens Primary Health Centre ah central fund hmanga rawih thawktu 6 te fund hmuh a tawp avangin damlo admit theih a ni tawh dawn rih lo tih Lungsens PHC Medical Officer Dr. Lalremruati chuan thuchhuah siamin a tarlang.**
- 4. Khawzawl district-ah ruihhlo awm lohna khua - drug free village atan Tlangmawi thlan a ni.**

<><><>

SWACHHTA HI SEVA

Nimin khan Hnahthial DC Conference Hall-ah Faina Hapta-Swachhta Hi Seva 2025 kharna hun hman a ni.

He hun hi Addl DC, Pu Zothanmawia Khiangte kaihhruaiin, Hnahthial Bawrhsap, Pi K.Vanlalruati chuan faina lama hmasawn tur chuan zirtirna tha neih mai piah lamah rilru puthmang thlak danglam a pawimawh thu a sawi.

Bawrhsap chuan fai tur chuan mahni theuh atanga tan a pawimawh thu a sawi a. Mimal faina chuan chhungkaw faina thlenin chu chuan vengchhung faina a thlen a, kan khawtlang chu khaw nuam leh veng nuam a siamtu chu a chhung a cheng mipuite an ni, tiin tanrual pawimawhna a sawi a. Kan tui luankawr te hi a thianghlim loh chuan natna tam tak thlentun a nih thin avangin enkawl thianghlim a pawimawh thu sawiin faina chu mitin mawhphurhna a nih thu leh faina inzirtir uar sauh sauh turin mitinte chu a chah a ni.

District Urban Development Officer, Pu Hmingmawizuala chuan Swachhta Hi Seva thupui leh hman a nih chhan te sawiin PHE Sr. EE, Pu K. Lalkima chuan lawmthu sawina nen hun a khar a ni.

<><><>

GOVERNOR

Mizoram Larsap General (Retd.) Vijay Kumar Singh chuan nimin khan Sairang Railway Station tlawhin a enfiah a, Railway hotute a kawm bawk.

Larsap chuan a vawi khat nana Indian Railway Network nena Mizoram khawpui Aizawl thlunzawm a ni leh, India ram khawpui pawimawh tak takte awlsam taka train hmanga thlen theih a ni ta chu lawmawm tiin, Northeast Frontier Railway hotute chu a enkawl leh tihchangtlun zelna turah theihtawp chhuah turin a chah a. Rel service mumal leh khailhlak lo, mipui tana awlsam leh him, faina leh kawng tinrenga ram chhung hmun dangte entawntlak siam kawngah theihtawp chhuah tlan a tul thu a sawi bawk.

He hunah hian Railway Deputy Chief Engineer Pu Harjimal Meena chuan Sairang Railway Station technical report tlangpui Larsap hi a hrilhfiah a. Badarpur Area Manager Pu Virendra Kumar Meena pawhin hmalakna leh hriattur pawimawhte Larsap hi a hrilhfiah bawk a ni.

Prime Minister Pu Narendra Modi chuan September ni 13 khan Cheng Vaibelchhe 8,071 senga siam Bairabi-Sairang New Railway Line hi a hawng a, KM 51.38 a thui niin Sairang-Delhi (Anand Vihar Terminal) Rajdhani Express, Sairang-Guwahati Express leh Sairang-Kolkata Express-te chu a vailiam a; Mizoram khawpui chu India Rail Network nen a vawikhat nan thlunzawm a ni.

Bairabi-Sairang New Railway Line-ah hian leiverh 48 (KM 12.85 a thui), Leidawh lian tham 55 leh a te deuh 87 bakah Railway Station 4- Hortoki, Kawnpui, Mualkhang leh Sairang te a awm a ni.

<><><>

LUNGSEN PHC

Lungsen Primary Health Centre ah central fund hmanga rawih thawktu 6 te fund hmuh a tawp avangin damlo admit theih a ni tawh dawn rih lo tih Lungsen PHC Medical Officer Dr. Lalremruati chuan thuchhuah siamin a tarlang.

Thuchhuahina tarlan dan chuan tun hnai khan IPA fund atanga Group D staff an rawih mi 6 te chu central atanga fund a tawp avangin an chawlh a ngai ta a, hei vang hian Lungsen PHC chuan harsatna a tawk ta a ni. Hemi avang hian Lungsen PHC ah Damlo admit a theih dawn rih lova, staff indaihlohna in ziaawm lam a pan hunah dan pangngaiin a kal leh tur thu Medical Officer chuan a sawi. Hetihlai hian Lungsen PHC a thawk tur group D staff 1 chu hmun dang atanga attach nghal a ni thung.

Tun dinhmunah Lungsen PHC ah hian thawktu 12 awm mekin Doctor 1, Nurse 4 leh Group D 1 bakah Health Supervisor-1, BAM-1, Xray Technician-1, leh Field Worker 3 an ni.

Lungsen PHC ah hian Lab. Technician post pawh tun dinhmunah a ruak mek a, natna zawn chhuah kawngah harsatna an nei chho mek bawk niin kan corr thudawnna chuan a sawi a, PHC ah hian Male leh Female ward ah khum 3 ve ve awmin maternity ward ah khum 2 a awm a. Tunlai tak hian damlo an nei lova, hetihlai hian OPD ah chuan nitin mi 20 bawr vel chu an in entir ve thin. Hun engemawchen atang khan X-Ray hi tih theih lovin a awm a, a enkawltu awm loh vang ni bawk a ni.

<><><>

KHAWZAWL

Khawzawl district-ah ruihhlo awm lohna khua - drug free village atan Tlangmawi thlan a ni.

Khawzawl District Narco Co-ordination Centre (NCORD) chu Thawhtanni khan district bawrhsap K Vanlalthiana kaihhruaiin an thukhawm a; Khawzawl district drug free village atan Tlangmawi khua thlangin, ruihhlo supply a tlem theih nan source tha tak neih ni se, an ti. October thla chhungin ruihhlo leh a kaihhnawih lama thalaite an fihlim theih nan inzirtirna buatsaih an rël.

Khawzawl district-ah hian July ni 10 atanga September 28 chhung khan Excise & Narcotics department mite'n zu kaihhnawihah dan bawhchhia mi 35 an man a, thubuai 37 an ziaak lut a. Kohhran hruaitute chu an bial fannahte ruihhlo donaa tan la ve turin an ngen a; October thla chhungin sunday school naupangte zingah ruihhlo laka an fihlim theih nan awareness neih an rël bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

NATIONAL VOLUNTARY BLOOD DONATION DAY

Mizoram chu hmarchhak biala a thlawna thisen pe tha ber niin, ram pum huapa hmeichhia thisen pe tha ber state a ni bawk.

He thu hi nimina National Voluntary Blood Donation Day puala Hrangbana College, Aizawl a hmannaah MSACS Project Director, Dr. Jane Rinsangi Ralte chuan sawiin Mizoram chu a thlawna thisen pekah ram pum huapa ti tha zingah a tel a, hmarchhak bial bikah phei chuan pakhatna a ni a ti. Nimin khan AIIMS, Delhi-ah Directorate General of Health Services-a national blood transfusion services atangin Mizoram aiawhin Health Department officer in chawimawina hi a dawng a ti a, India ram pumah hmeichhe thisen pe zat chawhrual zaa 5 a nih laiin, Mizoramah chuan zaa 30 a ni a, hmeichhe thisen pek lamah Mizoram chuan ram pumah a ti tha lawr lak a ni a ti bawk.

He hun hmanpuitu Pu Jeje Lalpekhlua, MLA pawhin thusawiin, kalkhawmte chu an pian leh seilenna Mizoram ti hmingtha tur leh tihmasawn turin thisen pek a ni emaw an theihna zawnah theihtawp chhuah turin a sawm a ni.

National Voluntary Blood Donation Day hmannaah hian Mizo hmeichhe zinga a thlawna a thisen vawi 20 pe chin leh College leh University zirlai hmeichhe zinga thisen vawi 10 pe tling tawh te hnenah chawimawina hlan a ni a, Mizoram hmun dangah pawh hman a ni.

<><><>

CM

Chief Minister Pu Lalduhoma chuan nimin tlai khan, kumin May ni 30 zana Lawngtlai Bazar Veng leh Chandmary Venga leiminna chu a hmunah enin, hmalak zui dantur thlirna a nei.

Chief Minister hi Lawngtlai DC, Pu Donny Lalruatsanga'n Leiminna laiah lo dawngsawngin, Adviser to Chief Minister Dr. Lorrain Lalpeklana Chinzah leh Lawngtlai Bawrhsap Pu Donny Lalruatsanga ten chhiatna thlendan kimchang Chief Minister hi an hrilh a. Chhiatna thlengah Sawrkar leh Tlawmngai Pawl te tanrualna thatzia te, chhanchhuah leh chhawmdawlina pawh theihtawp chhuaha neih a nih thu bakah sawrkar anga tihtheih ang ang tanpuina leh chhawmdawlina lam hawi pawh buaipui a nih thute Chief Minister hi an lo hrilh a ni.

Chief Minister Pu Lalduhoma chuan chhiat tawkte a tawrhpuithu a sawia, chhiatna vanga In leh bungrua chhiate hlut zawng mumal taka chhutchhuaka, a ranglama report siam a, Central lamah thehlutin, amah pawn a bawhzuinaah theihtawp a lo chhuahtur thu a sawi. In chim senghawi kim loh pawh a theih anga senghawi dan ngaihtuah tha a tih thu Chief Minister hian a sawilang tel bawk.

Kumin May ni 30 zana Bazar Veng leh Chandmary Venga leimin vang khan In-rellai pahnih telin RCC Building paruk leh Assam Type pakhat a chhia a ni.

<><><>

RD MINISTER

Rural Development & Administration Minister Prof.Lalnilawma chuan nimin khan West Phaileng Rural Developemnt Golden Jubillee hmanpuiin BDO office sak thar chu a hawng nghal.

Prof. Lalnilawma chuan Golden Jubillee hial an lo thlen takah chuan thawktute chu mipui tana thawk an nih angin, hna thawk tha tawk an inti em tih chu mahni inzawt turin a chah a. Rural Development-a thawk an nih chuan thingtlang lama chengte tana thawk kan ni tih inhria a, mahni ke a ding thei tura chherchhuah tum tur leh self help group te'n an thil siamte rampawna thawncchhuah a nih theihna turin Sawrkar pawhin theihtawp a chhuah thu a sawi bawk.

RD Minister chuan Rural Department chu mirethei leh harsa zawk tana ding a nih angin, insak tanpuina lokal thin pawh a dawng tur dik takin an dawng tur a ni a, party mi leh sa induhsakna chi a ni lo a, tanpuina hmu tur takin an hmuh chuan khua/veng in hma kan sawn phah chu Sawrkar duh dan a ni a ti. Sawrkar chuan Kuthnathawtute a ngaipawimawh a, an ei zawinna feh kawng tha zawk a cheibawl sak turin ruahmanna a siam mek a ni a ti bawk.

West Phaileng BDO office sak thar hi Floor 4 a sak niin MGNREGA material component sum atangin cheng nuai 211 senga sak a ni. Kum 2023 November thla khan sak tan niin, kumin April thla khan sak zawh a ni. Building lenzawng hi square meter 175 a ni. West Phaileng RD Block hi kum 1974 ah hawn a ni a, BDO 29 te'n thutchilh tawhin, tunah hian thawktu 40 an awm mek a ni.